

HARBIY-SPORT MUSOBAQALARINI TASHKILLASH VA O‘TKAZISH

Tuxtazarov Ilxom Ibragimjanovich

Fardu harbiy ta'lim fakulteti o'qituvchisi

Xofizov Javoxirbek Kurbanbay o'g'li

Fardu harbiy ta'lim fakulteti 4- bosqich kursanti

Annotatsiya: Harbiy sport musobaqasi bu chaqiruvga qadar boshlang'ich tayyorgarligi fanini o'zlashtirishni, to'garak va o'quv mashg'ulotlari ishlarining yakunini o'tkazish demakdir.

Kalit so'z: Ommaviy-mudofaa ishlari, harbiy-texnik tayyorgarlik, sportning harbiy texnik turlari, mudofaa-sport sog'lomlashtirish oromgohlari, ommaviy-mudofaa ishlari oyligi, moddiy texnik baza, tadbirlarni mafkuraviy-siyosiy mazmuni, harbiy-texnik va jismoniy tayyorgarlik, musobaqa dasturi, mudofaaga ko'maklashuvchi «Vatanparvar» tashkiloti.

Har bir musobaqa tasdiqlangan dastur shartlari asosida o'tkazilishi kerak. Bu dastur musobaqa o'tkazishning asosiy hujjati bo'lib hisoblanadi. Musobaqa dasturi musobaqa o'tkazilishdan ikki oy avval direktor tomonidan tasdiqlanadi. Dastur tasdiqlangandan so'ng kuchga kiradi va unga musobaqa davomida ham musobaqadan keyin ham o'zgartirish kiritish qat'iy ta'qiqlanadi. Musobaqa dasturi odatda 10 ta bo'limdan iborat bo'ladi:

- ushbu musobaqaning maqsad va vazifalari yoritib beriladi;
- musobaqani o'tkazish joyi va vaqti ko'rsatiladi;
- musobaqa rahbariyati haqida ma'lumotlar;
- musobaqani moddiy texnik jihatdan ta'minlash kimga yuklatilganligi;
- musobaqa qatnashchilari va komandalar tarkibi;
- musobaqa dasturi;
- musobaqani o'tkazish shartlari;
- birinchilikni va shaxsiy musobaqa g'oliblarini aniqlash tartibi;

qatnashchilarni mukofotlash tartibi;

musobaqalarda qatnashish uchun arizalar berish tartibi ko'rsatib o'tiladi.

Musobaqalarda ko'rsatiladigan natijalar, eng avvalo, qatnashchilarning musobaqaga tayyorgarligi sifatlariga bog'liq bo'ladi.

Musobaqalar boshlanishidan ikki oy avval qatnashuvchilar tomonidan musobaqa shartlari, har bir sport turi harbiy «Alpomish» va «Barchinoy» maxsus testlaridagi normativlar ko'rib chiqilishi kerak bo'ladi. Musobaqa qatnashchilari uchun har bir sport turi doimiy, haftasiga 2-3 marotaba mashg'ulotlar tashkil etilish mumkin.

Komanda tarkibini tuzish va musobaqaga ariza topshirishdan bir haftadan oldinroq yakuniy sinov nazoratini o'tkazish maqsadga muvofiqdir.

Bu sinov nazorati natijalariga asoslanib, komandani asosiy tarkibini aniqlash mumkin. Musobaqalarga tayyorlanish davrida sport inventarlari jihozlarini, texnika va qurol-yaroqlarni yaxshi holatga keltirish juda muhimdir.

Musobaqalar sifati va ularni tartibli o'tishi, ularning o'quv moddiy bazasini puxta tayyorlashga bog'liq bo'ladi. Musobaqa qayerda bo'lishi, yugurish yo'lakchalarini kim va qayerda tayyorlashi, qaysi tirda o'q otish o'tkazilishi va shunga o'xshash barcha savollar aniq va ravshan belgilab olinishi kerak. Bundan tashqari u yoki bu sport inshootini sportchilarni qabul qilish imkoniyatlarini ham to'g'ri belgilash juda muhimdir. Masalan, granata uloqtirish maydonchasiga faqat 1 kishi joylashadi. Mashqni bajarish uchun zarur bo'lgan vaqt (1 imkoniyat) 1 daqiqa. Agar dasturda 2 ta imkoniyatdan foydalanish ko'rsatilgan bo'lsa, o'z-o'zidan mashqni bajarish uchun bo'lgan vaqt ham 2 barobar ko'payadi, ya'ni 2 daqiqa bo'ladi. Komanda tarkibi 20 kishidan iborat. Shunday ekan, komandaga bu mashqni bajarishi uchun 40 daqiqa kerak bo'ladi. Komandalar almashishiga, tayyorlanishga yana 5 daqiqa ajratiladi. Shunday qilib, granata uloqtirish harbiy 4 ta komanda musobaqasi uchun umumiy hisobda 3 soat vaqt kerak bo'ladi.

Mana shunday hisoblarni har bir sport turi bo'yicha bo'ladigan musobaqalar uchun ham tuzish kerak. Bu musobaqalarni to'g'ri tashkil etishga va o'z vaqtida o'tkazishga yordam beradi.

Yuqorida ko'rib o'tilgan ommaviy- mudofaa ishlarining shakl va uslublari turli tumandir. Bu ishlarni tashkil etish va o'tkazishga harbiy ta'lim o'qituvchilari ijodiy tarzda yondashishlari kerak. Chunki, o'quvchi yoshlarni harbiy bilimlar bilan qurollantirish, ularda harbiy kasblarni egallashga bo'lgan ishtiyoqni tarbiyalash, harbiy-sport turlarini yoshlar orasida keng tashviqot qilish, bu tadbirlar yordamida ularda O'zbekistonga, uning Qurolli Kuchlariga muhabbat va sadoqat tuyg'ularini tarbiyalash demakdir.

Prezidentimiz, O'zbekiston Respublikasi Qurolli Kuchlari Oliy Bosh Qo'mondoni Sh.Mirziyoev ta'kidlaganidek, "Milliy armiyamiz ming-minglab o'g'lonlarimiz uchun fidoyilik, mardlik va haqiqiy vatanparvarlik maktabi bo'lishi kerak". Albatta, bunday maqsadlarga yetish, rejalashtirilgan natijalarga erishish o'qituvchilardan, ommaviy mudofaa ishlari tashkilotchilaridan katta kuch-g'ayrat, bilimdonlik, yuksak tashkilotchilik sifatlari bo'lishini talab qiladi. O'z ishiga ijodiy tarzda yondashib, bu tadbirlarni turli uslub va shakllarini amaliyotga joriy etib, yoshlarni Vatan himoyasiga tayyorlash, davlat ahamiyatiga ega bo'lgan muhim vazifalardan biri ekanligini chuqur his etgan o'qituvchilar albatta, o'z oldilariga qo'yilgan bu sharaflari vazifalarni bajarilishining uddasidan chiqadilar.